

Bil. 7

Isnin

30 Julai 2018



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

**PARLIMEN KEEMPAT BELAS
PENGAL PERTAMA
MESYUARAT PERTAMA**

KANDUNGAN

UCAPAN DI BAWAH USUL BERKENAAN PERKARA TADBIR KERAJAAN [P.M.17]:

- **Isu Pelaksanaan Caruman 2 Peratus KWSP
kepada Suri Rumah**
- YB. Dato' Dr. Noraini Ahmad (*Parit Sulong*)

[Halaman 1]

**MALAYSIA
KAMAR KHAS
PARLIMEN KEEMPAT BELAS
PENGKAL PERTAMA
MESYUARAT PERTAMA**

Isnin, 30 Julai 2018

Mesyuarat dimulakan pada pukul 2.30 petang

DOA

*[Timbalan Yang di-Pertua (Dato' Mohd Rashid Hasnon)
mempengerusikan Mesyuarat]*

**UCAPAN DI BAWAH USUL
BERKENAAN PERKARA TADBIR KERAJAAN (P.M. 17)**

Isu Pelaksanaan Caruman 2 Peratus KWSP kepada Suri Rumah

2.34 ptg.

Dato' Dr. Noraini Ahmad [Parit Sulong]: Terima kasih Tuan Yang di-Pertua. *Bismillahir Rahmanir Rahim*. Saya ingin membawakan satu isu yang telah menarik perhatian rakyat iaitu mengenai pelaksanaan 2 peratus caruman Kumpulan Wang Simpanan Pekerja (KWSP) kepada suri rumah seperti yang telah dijanjikan oleh pihak kerajaan semasa pilihan raya yang lalu. Saya tidak menafikan ia dilihat sebagai satu cubaan untuk memartabatkan peranan wanita sebagai suri rumah dalam institusi kekeluargaan di negara ini.

Namun begitu, terdapat beberapa perkara yang perlu diperjelaskan oleh pihak kerajaan mengenai pelaksanaan caruman ini seperti yang termaktub di dalam Buku Harapan pada muka surat ke-177, iltizam kedua, perenggan ketujuh yang berbunyi, "*Memperkenalkan Skim KWSP untuk suri rumah. Caruman akan disumbangkan daripada caruman KWSP para suami yang bekerja pada kadar 2 peratus sebulan yang tidak membebankan. Sebagai tanda penghargaan kepada suri rumah, Kerajaan Pakatan Harapan akan memberi sumbangan caruman sebanyak RM50 sebulan kepada KWSP para suri rumah*".

Saya melihat sekiranya pelaksanaan yang dilakukan adalah secara wajib pada kadar caruman 2 peratus campur 11 peratus, ia dilihat akan memberi sedikit beban kepada para suami dengan *disposable income* akan berkurangan. Jika caruman dilakukan pada kadar 9 peratus campur dua peratus pula, ia secara langsung akan mengurangkan caruman si suami dan ini

secara tidak langsung adalah bertentangan dengan perancangan KWSP itu sendiri dalam memastikan pencarum boleh bersara dengan selesa.

Menurut satu ulasan oleh Profesor Jomo Kwame Sundaram di ruangan Malaysiakini yang bertarikh 25 Oktober 2017, ada dinyatakan tentang satu kajian bahawa sehingga tahun 2015, sebanyak 68 peratus ahli KWSP berusia 54 tahun mempunyai kurang daripada RM50,000 dalam simpanan mereka. Dengan garis talian kemiskinan isi rumah ditetapkan pada RM930 sebulan, simpanan RM50,000 hanya akan bertahan 4.5 tahun, manakala satu perlima golongan bawahan ahli KWSP mempunyai simpanan purata hanya RM6,909 sahaja. Oleh yang demikian, saya mohon untuk dijelaskan di sini mengenai beberapa persoalan kepada pihak kementerian seperti berikut.

Pertama, bagaimanakah pelaksanaan caruman 2 peratus kepada suri rumah ini akan dilaksanakan tanpa membebankan para suami, khususnya mereka yang berpendapatan rendah? Seterusnya, apakah pihak suami perlu memperuntukkan sejumlah tambahan 2 peratus lagi sekiranya mempunyai dua orang isteri dan kedua-duanya adalah suri rumah atau apakah kedua-dua isteri tersebut perlu membahagikan caruman 2 peratus itu? Apakah terdapat alternatif lain sekiranya si suami enggan mencarumkan 2 peratus daripada carumannya kepada si isteri? Sekian, terima kasih. Akan tetapi sebelum itu, saya hendak mengucapkan terima kasih kepada Yang Berhormat Menteri yang datang ke Kamar Khas ini untuk menjawab soalan ini. Terima kasih.

2.38 ptg.

Timbalan Perdana Menteri dan Menteri Pembangunan Wanita, Keluarga dan Masyarakat [Dato' Seri Dr. Wan Azizah Wan Ismail]: Terima kasih Tuan Yang di-Pertua. *Bismillahir Rahmanir Rahim*. Terima kasih kepada Yang Berhormat Parit Sulong yang menyoalnya. Saya menjawab ya. Golongan wanita terdiri daripada 48.42 peratus populasi negara. Umur median mereka adalah 28.5 tahun yang merupakan kumpulan produktif. Namun begitu, hanya 54.6 peratus sahaja wanita yang berada dalam pasaran buruh.

Bagi wanita yang menjadi suri rumah, ianya satu kerjaya yang mulia dan penting dalam memastikan kestabilan serta keharmonian sesebuah institusi keluarga dan rumah tangga. Sebagai entiti penting dan aset sesebuah negara, suri rumah harus diberikan penghargaan dan pengiktirafan. Pada masa yang sama, suri rumah adalah golongan yang paling terdedah kepada kesusahan apabila terdapat musibah seperti kematian suami, suami hilang upaya, penceraian atau sekiranya terdapat ahli keluarga yang tidak bertanggungjawab dan menimbulkan konflik.

Dalam usaha memastikan keselamatan sosial wanita terjamin, kerajaan komited menyediakan beberapa inisiatif. Antaranya, memperkenalkan skim KWSP untuk suri rumah ini. Beberapa siri mesyuarat dan perbincangan telah pun diadakan bagi meneliti mekanisme pelaksanaan skim KWSP untuk suri rumah. Antaranya, saya telah mempengerusikan mesyuarat berkenaan cadangan perluasan perlindungan sosial kepada suri rumah bersama dengan Kementerian Sumber Manusia, *actually now* dipanggil Kementerian Tenaga Manusia, Kementerian Kewangan, KWSP dan PERKESO pada 31 Mei yang lalu. Saya juga telah mempengerusikan Bengkel Mekanisme Pelaksanaan Caruman KWSP Untuk Suri Rumah Fasa 1 yang telah diadakan pada 28 Jun tahun ini, yang lalu.

■1440

Inisiatif khusus untuk kaum wanita ini diwujudkan bagi memperkasakan hak wanita dan melindungi suri rumah dan ahli keluarga yang lain. Cadangan asal skim ini melibatkan simpanan kepada suri rumah melalui sumbangan caruman pekerja iaitu suami pada kadar 2 peratus dan sumbangan kerajaan, kerajaan tambah RM50 sebulan. Caruman ini pada dasarnya merupakan satu bentuk galakan kepada kaum lelaki untuk memikul tanggungjawab dan menunjukkan komitmen menabung untuk simpanan sebagai persediaan perlindungan masa hadapan untuk isteri dan anak. Kerajaan sedar kadar yang ditetapkan untuk suri rumah adalah rendah, 2 peratus dan simpanan suami yang berpendapatan rendah juga tidak mencukupi. Namun, inilah langkah awal kerajaan dalam membina sistem saringan sosial yang lebih komprehensif di masa depan. Kita mulakan dahulu.

Sebagaimana yang dikatakan kalau ada kereta, kalau tidak servis, bila *breakdown*, bila rosak, memang lebih memerlukan banyak lagi kos untuk memperbaiki. Jadi, kita buat sedikit-sedikit. Kemungkinan akan mengambil masa. Kemungkinan akan bermula dengan kecil ini, dia akan seperti *snowball*, menjadi lebih besar pada masa hadapan *insya-Allah*. Caruman berstruktur ini dijangka dapat menjadi tabungan bagi mempersiapkan suri rumah menghadapi kemungkinan yang tidak diingini untuk meneruskan kelangsungan hidup pada masa yang akan datang.

Bagi memenuhi iltizam kerajaan kepada rakyat, skim KWSP untuk suri rumah tetap akan dilaksanakan. Pelaksanaan skim ini dicadangkan untuk dilaksanakan secara berfasa memandangkan pelaksanaan skim ini akan memberi manfaat kepada suri rumah bukan sahaja berbentuk simpanan, tetapi juga akan memanfaatkan *insya-Allah* perlindungan sosial di bawah PERKESO. Bagi peringkat awal, pelaksanaan skim KWSP untuk suri rumah ini akan dijalankan, berbentuk caruman sukarela dan bersasar kepada yang miskin dan miskin tegar yang *bottom* daripada *bottom* B40 ini.

Pelaksanaan caruman secara sukarela adalah sebagai sumbangan oleh para suami bagi menghargai isteri di samping sebagai satu bentuk tabungan dan simpanan masa hadapan. Memandangkan sifatnya sukarela, suka dan rela. Ia tidak membebankan kerana pencarum boleh memilih untuk tidak menyertai skim ini sekiranya tidak mampu atau merasakan memang tidak mahu bersama-sama dalam skim ini.

Bagi merealisasikan skim ini juga, Kementerian Pembangunan Wanita, Keluarga dan Masyarakat telah membentangkan satu Memorandum Jemaah Menteri dalam Mesyuarat Jemaah Menteri pada 25 Julai yang lalu. Mesyuarat mencadangkan supaya mekanisme pelaksanaan ini iaitu KWSP suri rumah dibincangkan dengan lebih lanjut dalam mesyuarat yang akan datang kerana terdapat kekangan dari segi dana untuk pelaksanaan skim ini kerana kita komited dan kerajaan hendak berikan duit itu setiap bulan, jadi ia memerlukan dana yang mencukupi. Kita tidak mahu jika kalau kita kata ya, tetapi kita tidak dapat memenuhi. Kita hendak buat cara-cara mana kita sedaya upaya kita menjayakan skim ini. Kementerian akan tetap berusaha untuk melaksanakan komitmen kerana ini adalah seperti mana Yang Berhormat Parit Sulong katakan, apa yang kita janjikan.

Tuan Yang di-Pertua, bagi menjawab persoalan mengenai adakah pihak suami perlu memperuntukkan sejumlah tambahan 2 peratus lagi sekiranya mempunyai lebih daripada seorang isteri yang menjadi suri rumah, perkara ini sedang diperhalusi. Akan tetapi seperti yang saya biasa jawab, saya sudah jawab, kalau bila tambah dua tiga empat itu, saya kira boleh mampulah memberikan lagi 2 peratus. Apalah kiranya, 2 peratus sahaja. Oleh itu, kita akan perhalusi oleh pihak KWSP dan PERKESO sebagai agensi pelaksana. Pelaksanaan caruman wajib 2 peratus dan liputan perlindungan keselamatan sosial oleh PERKESO memerlukan pindaan kepada akta. Dia ada akta ya, dasar dan peraturan sedia ada di bawah KWSP dan PERKESO di mana masing-masing adalah di bawah bidang kuasa Kementerian Kewangan dan Kementerian Tenaga Manusia.

Buat masa ini, dicadangkan sumbangan kerajaan sebanyak RM50 hanyalah untuk isteri yang pertama. Sekiranya suami enggan mencarum 2 peratus daripada caruman pekerja kepada isteri yang merupakan suri rumah, suri rumah boleh mendapat manfaat tabungan dan sumbangan kerajaan melalui— Ada lagi skim yang saya kira Yang Berhormat Parit Sulong pun mengetahui, Skim Simpanan Persaraan 1Malaysia yang telah diperkenalkan oleh KWSP sejak Januari 2010.

SP1M ini diperkenalkan bertujuan untuk memastikan golongan yang bekerja sendiri dan tiada pendapatan tetap termasuklah suri rumah mempunyai simpanan apabila mencapai umur persaraan. Konsep SP1M ini adalah menggalakkan caruman secara sukarela ke dalam akaun KWSP yang mengikut kemampuan. Simpanan ini akan menerima sumbangan dari yang

dipadankan daripada kerajaan sebanyak 15 peratus dari amaun caruman tertakluk kepada jumlah maksimumnya RM250 sebulan. Itu adalah kerajaan lama. Apa yang kita cadangkan adalah RM50 sebulan yang merangkumi sampai RM600 setahun. Terima kasih.

Timbalan Yang di-Pertua [Dato' Mohd Rashid Hasnon]: Terima kasih Yang Berhormat Menteri. Ahli-ahli Yang Berhormat, Mesyuarat Kamar Khas hari ini ditangguhkan sehingga jam 2.30 petang hari Selasa, 31 Julai 2018.

[Kamar Khas ditangguhkan pada pukul 2.46 petang]